

tandus sebagai suatu bencana dan kematian bangsawan-bangsawan saudara sebagai suatu kehilangan maka dari sekarang lebih baik jangan saudara mengikat janji setia. Sebaliknya sekiranya saudara-saudara telah penuh tekad dan teguh hati akan bersedia mengorbankan harta-benda dan jiwa-raga sebagai natijah daripada sumpah setia itu maka lakukanlah sekarang juga, dan demi Allah saudara-saudara akan mendapat kebahagiaan dunia dan akhirat.”

Tenang sejenak suasana di tempat itu mendengar perkataan Al-‘Abbās tetapi sejurus dengan serentak mereka berkata:

“Kalau kami bersedia mengorbankan harta-benda dan jiwa kami, ya Rasul Allah, dan kami penuhi sumpah setia ini apakah balasan yang kami terima ya Rasulullah?”

Dengan spontan Rasulullah bersabda: “syurga *Jannah al-Na‘īm!*”

“Tadah tangan tuan, ya Rasul Allah!” Kata mereka memohon kepada Rasulullah sambil mengucapkan sumpah setia di bawah naungan gelap gelita dalam malam yang sunyi di ‘Aqabah.

Apabila selesai sumpah bersetia Al-‘Abbās ibn ‘Ubādah tegak berdiri dan berkata dengan suaranya yang langgam menggambarkan kebesaran jiwanya dengan berkata:

“Wahai Junjungan kami! Jika tuan kehendaki besok pagi akan kami suruh pedang-pedang kami menari di atas tengkuk kepala penduduk-penduduk tanah Makkah yang masih tetap durjana ini, ya Rasulullah!”

“Belum masanya lagi” jawab

Muhammad, “Saya berharap saudara-saudara lekas pulang ke Yathrib.”

\* \* \*

Spontan kata Nabi “syurga *Jannah al-Na‘īm!*” telah mengikat kecintaan dan roh perjuangan orang-orang yang baharu bersetia dengan Nabi dan telah bersedia mengorbankan segala-galanya, harta-bendanya, jiwanya, untuk menegakkan kalimah Allah, untuk mendirikan Islam dan dengan jiwa yang membaja yang tak lapuk dek hujan tak lekang panas, mereka menegakkan Islam dan berdirilah Islam dengan bantuan saudara-saudara Anṣār ini sehingga kelihatan Islam berada hingga hari ini. Tetapi apakah jiwa Islam yang demikian bergelora di dalam sanubari pemeluk-pemeluk Islam yang mengucap *lā ilāha illa Allāh Muḥammad rasūl Allāh* yang ada pada hari ini?! Jawabnya terpulangnya kepada pemeluk-pemeluk Islam sendiri dan kepada mujahid-mujahid mereka.

#### Membetulkan Kesilapan

Di dalam majalah Qalam bilangan 201 keluaran bulan April 1967 pada muka 34 kolom yang pertama barisan yang keenam telah berlaku suatu kesilapan cetak dengan tidak senghaja.

Jumlah yang tersilap itu betulnya hendaklah dibaca demikian:

“Bahawa agama Islam ialah pertunjuk yang datangnya daripada Allah ‘*Azza wa Jalla* yang tidak harus Ia (Tuhan) bersifat kekurangan atau lupa . . .”

**Harap Maaf!**

## Cabutan

Dalam Konfrontasi, kita tidak rasa kesusahan apa-apa. Orang-orang kita berdancing-dancing womanizing (bersuka-suka dengan wanita), minum dan berjudi – Tengku dalam interviewnya kepada seorang penulis *Reader Digest*.

\*

Kebetulan Kementerian saya, Kementerian Kebudayaan, Belia dan Sukan, memang mengambil berat tentang pendidikan akhlak di kalangan belia mengingatkan bahawa keteguhan watak sesuatu bangsa atau masyarakat ini bergantung besar kepada bimbingan yang wajar bagi melahirkan angkatan muda yang berguna serta bertanggungjawab kepada masyarakatnya – Datuk Engku Muhsin.

\*

Cubalah pecahkan tradisi lama kepada tradisi baharu dalam perkahwinan campuran. Saya percaya pada satu hari yang akan datang timbul satu masyarakat baharu yang boleh dikatakan Malaysia – Menteri Muda Pelajaran Malaysia, Tuan Lee Suk Yu.

\*

Dan janganlah kamu menghampiri zina, kerana sesungguhnya adalah ia itu (zina) satu kejahatan dan buruk perjalanannya – maksud al-Qur’ān.

\*

Arak adalah ibu dan punca segala kejahatan – judi punca kepapaan – ajaran agama.

\*

Maksiat hendaklah kamu jauhi. - maksud al-Qur’ān.